

Konservi ĉion

Intervjuo al Lluís Hernández Yzal

Roland Rotsaert

Pro miaj klopodoj por reaktivigi la Fondaĵon Vanbiervliet de la Urba Biblioteko de Kortrijk (Flandrio) mi havis plurajn kontaktojn kun similaj bibliotekoj eksterlandaj. La prizorganto de la Hispana Esperanto-Muzeo, s-ro Lluís Hernández Yzal, invitis min por surloke esplori la organizon kaj funkciadon de lia biblioteko. Mi akceptis tiun inviton kaj en oktobro 1995 pasigis unu semajnon ĉe li. Dum tiu semajno okazis la sekvanta intervjuo.

Klasika demando: kiam vi lernis esperanton? Kial?

Kiam mi komencis kiel apotekisto en Sant Pau mi estis malriĉulo, kun nur biciklo kiel transportilo. La loka bicikloriparisto, s-ro Sans, estis malnova esperantisto, kiu ankoraŭ konis Zamenhof. Li regule klopodis persvadi min lerni esperanton, sed tio ne vere interesis min. Mi ja jam estis membro de kelkaj grupoj de kolektantoj, kiuj tiutempe uzis libretojn kun modelaj frazoj por internacia korespondado kaj tio funkciis kontentige.

Malgraŭ mia malemo li abonis kelkajn gazetojn por mi kaj en 1955 aŭ 1956 eĉ aperigis korespondpeton en *Heroldo de Esperanto*. Do, ne forĵetante gazetojn kaj iom korespondante, mi tamen konatiĝis kun la lingvo.

Ankaŭ s-ro Ramon Molera jam en 1952-53 sugestis korespondan kurson, sed mi ne ŝatis kaj cetere havis multe da laboro en mia apoteko.

La afero komenciĝis kiam mi, en 1963, pro scivolemo vizitis la

hispanan kongreson en Barcelona, kie estis ĉ. 700 partoprenantoj. Tiam mi iĝis konvinkita kaj vere ekstudis.

Kiam ekestis la ideo de esperanto-muzeo?

Mi rapide ekhavis kvardekon da korespondantoj, sed pro tempomanko kaj pro altaj kostoj de afranko mi devis limigi min. Mi demandis min kiun alian utilan aferon mi povus entrepreni. Es-tante kolektema homo, mi decidis ekkolekti esperanto-revuojn; tiutempe mi pensis ke estas nur 300 aŭ 400 kaj ne antaŭvidis problemojn. Samtempe, Molera ekkolektis precipe librojn. Multaj personoj helpis nin per donacoj.

En 1962-63 oni atentigis min pri la vendo de librokolekto de mortinta esperantisto, gravulo de la hispana movado antaŭ la unua mondmilito. La heredanto petis 5.000 pesetojn, grandega sumo en tiu tempo. Mi ja intencis nur elspezi 2.000, sed li minacis vendi la tuton al brokantisto. Feliĉe mi havis 5.000 pesetojn kaj aĉetis ĉion. Tiel subite al mia kolekto de

400 esperanto-libroj venis 800 pliaj (kvankam multaj duoblaĵoj) kaj mi krome dufoje plenigis mian aŭtomobilon per revuoj. En la sama periodo mi renkontis s-ron Joan Amades, grava kataluna folkloristo kaj esperantisto, kiu kolektis de ĉiu revuo la unuan numeron; ankaŭ li havigis multon al mi. Jen la ekesto de la kolekto.

Kion pensis via edzino pri tio?

Komence, ni regule vizitis esperanto-kongresojn kiel tiu de Barcelono, sed por ne tro ĝeni ŝin ni restis nur dum mallonga tempo en la kongresejo kaj poste promenis en la urbo. Post la tria kongreso ŝi diris al mi ke mi decidu: ĉu sekvi la kongresojn entute, ĉu ne partopreni. Ekde tiam mi iĝis aktiva kongresano kaj ŝi, havanta jam rondon de konatoj en esperantaj medioj, akompanis min.

Ankaŭ pri la muzeo ŝi iĝis min decidi. Ĉar nia domo rapide pleniĝis per libroj — mi ankaŭ kolektis grandan privatan, neesperantan bibliotekon — ŝi je iu tago diris: "Kial vi ne aĉetas tendon?" Ŝi sugestis al mi aĉeti terenon kaj



Sant Pau d'Ordal: Modele organizita biblioteko

konstrui domon speciale por la biblioteko. Feliĉe mi sukcesis akiri terenon en apuda strato, kiu kelkajn jarojn antaŭe ricevis la nomon "strato Zamenhof".

Via edzino do ludis gravan rolon?

Pro ŝi mi lernis atenti pri la opinio de edzino. Ja multaj esperantistoj devas ĉesi sian movadan aktivecon pro konflikto kun la partnero. Estis tial ke mi kreis la medalon "Klara Zilbernik" por premii edzinon kiu, ne estante esperantisto, multe helpis sian edzon, laŭ la ekzemplo de la edzino de Zamenhof kiu eĉ permesis uzi la doton por eldoni la unuan libron.

Mi jam vidis la diplomon honore al sinjorino Maria Teresa Massana de Yzal en la muzeo...

Tio estis iniciato de la dukeko da jam premiitoj okaze de la UK de Valencio en la jaro 1993.

Kaj intertempe la biblioteko daŭre pligrandiĝis?

Efektive. Ramon Molera — kaj poste lia filino Anna — prizorgis grandan bibliotekon, sed precipre pri libroj. Multajn gazetojn ili donacis al mi.

Ankaŭ kun Arpad Mathé el Budapeŝto — unu el miaj unuaj korespondantoj — mi regule in-

tersanĝis pakaĵojn kun revuoj. Krome, kolektanto de kajeroj manskribitaj de Zamenhof sendis nebezonatan materialon al mi. De s-ro Amouroux el Perpignan, kiu posedas multajn arĥivojn el la komenca periodo de esperanto, okaze de vizito mi regule ricevas keston kun legitaj revuoj.

Ne nur estas libroj kaj revuoj en la muzeo?

Esperantistoj donas ĉiuspecan materialon kaj mi opinias ke mi devas konservi ĉion. Ĉio utilas. Ekzemple, se venas buso kun vizitantoj, inter kiuj nur parto estas aktivaj esperantistoj, la nemovadanoj kontemplas la folkloran sektion, dum la aliaj esploras la seriozan parton de la biblioteko.

En la muzeo estas 2 000 skatoloj kun korespondaĵoj de diversaj esperantistoj, preskaŭ kompleta kolekto de esperantaj poŝtmarkoj, vizitkartoj, moneroj, afiŝoj...

Ĉu eblas doni kelkajn pliajn ciferojn pri la biblioteko?

Laŭ statistiko el septembro 1995 el 7 450 konataj titoloj de revuoj mi posedas parte aŭ komplete 3 147. Estas 12 851 jarkolektoj, el kiuj 6 929 kompletaj, kaj 9 401 libroj kaj broŝuroj.

Ĉu glate funkcias kontaktoj kun aliaj bibliotekoj?

Ĝenerale: se la alia biblioteko bone funkcias, jes; se ne, fiaskas. S-ro Gacond el La Chaux de Fonds multe helpas. Kun la biblioteko Faizi kaj d-ro Mathé, kaj pere de li kun la biblioteko de Vieno, estas regulaj kontaktoj.

Aliflanke, mi ĵus estis en Londono kaj, malgraŭ sufiĉe frua antaŭaverto, nur je reveno trovis leteron dirante "bedaŭrinde mi estos for...". Mi tre ŝatus viziti la bibliotekon Hodler ĉe UEA. S-ro Moerbeek promesis al mi helpon. Sinjorino Molera loĝas proksime kaj estas oftaj kontaktoj. Siatempe ankaŭ estis daŭraj interŝanĝoj kun Cesar Vanbiervliet.

Ĉu venas helpo de aliaj flankoj?

De la aŭtoritatoj mi nek postulis, nek ricevis helpon. Aliflanke tre ofte helpas esperantistoj. Ekzemple fervojistoj el Barcelona faris la literojn ĉe la eniro de la muzeo. Preskaŭ ĉiuj konsideras la bibliotekon proprietaĵon de Esperantujo. Mi pensas ke la sendependeco instigas al kunlaboro. Mi mem abonas ĉ. 30 revuojn kaj similan kvanton mi ricevas donace

de la eldonejoj. Kiam mi petas iun eldoniston ŝtopi truon en mia kolekto, li ĉiam volonte faras.

Kun granda intereso mi rigardis la funkciadon de via komputilo. La Hispana Esperanto-Muzeo verŝajne estas la nura esperanta biblioteko kiu tiel efike uzas komputilon. Laŭ mia scio nur Aalen havas elektronikan katalogon, sed kun malpli da eblecoj.

Jam de deko da jaroj mi uzas komputilon. Tion mi dankas al mia filo, kiu por la apoteko kaj por lia privata biblioteko intensive uzas komputilojn.

Per dBase kaj Clipper li verkis serion da programoj speciale por la biblioteko. Mi povas laŭbezone peti ĉiujn informojn, ekzemple dum kiom da jaroj aperis iu gaze-

to, kiuj libroj estas eldonitaj en iu ajn jaro, kiuj revuoj aperis en iu urbo, ktp. Mi volonte akceptos vizitantojn kiuj deziras propraokule vidi la funkciadon. Ankaŭ interese min diskedoj kun katalogoj de aliaj bibliotekoj.

Kvankam mi plej ofte laboras per komputilo, de tempo al tempo mi tamen faras surpaperajn katalogojn. Tiuj faciligas la kontrolon de la kolektoj, ekzemple por trovi erarojn aŭ mislokigitajn librojn.

La muzeo estu studloko?

Fakte la nomo "muzeo" ne plaĉas al mi. Oni konsultu la kolekton por studoj pri esperanto aŭ pri aliaj planlingvoj. Ĝi iĝis sufiĉe konata inter studemuloj. Iuj vizitas ĝin regule; aliaj sporade venas por kompletigi sian dokumentaron. ■

Deziras korespondi

✉ Kinga Gierula
ul. Bystrzańska, 14/4
PL- 43-309 BIELSKO-BIALA
(Pollando)

✉ Dolores Queiroz (37 j.)
rua Mário Barbedo, 134/101
Vila Valqueire
RIO DE JANEIRO - RJ
BRASIL - BR 21740-010

✉ Fernanda Queiroz (16 j.)
rua Mário Barbedo, 134/202
Vila Valqueire
RIO DE JANEIRO - RJ
BRASIL - BR 21740-010

✉ Marina Oliveira Santos (50 j.)
rua Comendador Portela, 31
Sulacap
RIO DE JANEIRO - RJ
BRASIL - BR 21740-010

✉ Nilva Salata da Silva (64 j.)
rua José Sardenha, 247
Sulacap
RIO DE JANEIRO - RJ
BRASIL - BR 21741-120

✉ Therezinha Lima Donda
rua José Sardenha, 307
Sulacap
RIO DE JANEIRO - RJ
BRASIL - BR 21741-120

✉ Rogério Peres Gutierrez (23 j.)
Padre Josinho, 17
Bangu
RIO DE JANEIRO - RJ
BRASIL - BR 21820-290

✉ Jander Fârias da Silva (17 j.)
Rua João Lacerda, 840
Bangu
RIO DE JANEIRO - RJ
BRASIL - BR 21820-000

✉ José Eudes dos Santos (22 j.)
rua Major João Gualberto da S.
Braga, 13 - Vila Kennedy
RIO DE JANEIRO - RJ
BRASIL - BR 21850-000

✉ Luiza Ludovina de Oliveira Motta
rua Cel Valença, 74
Magalhães Bastos
RIO DE JANEIRO - RJ
BRASIL - BR 21710-530

15a Internacia Literatura Forumo

"Teatro en Esperanto"

Szombathely, Hungario
5a - 10a julio 1996

Pledo flugi pli altan



Jam frue dum mia esperantĝo mi povis konstati ke Esperanto estis vere taŭga lingvo por altfluga poezia verkado. Scivoleme pri ĝia lingva genezo kaj la unuaj stadioj je plifirmiĝa evoluado, mi ree rimarkis tiu fakteen favore je inda poezia kreipoveco. Poste, de Delfi Dalmau mi legis jenan aserton: "... se dum la lastaj cent jaroj aperis multaj provoj por internacia lingvo, kaj nur Esperanto atingis grandan movadon, tiu fakto kredigas ke nur Esperanto estas bona, la sola internacia lingvo kiu naskiĝis poezie." Kaj en sekva paragrafo Dalmau vinktas sian ideon: "Poezio — kaŭzo kaj idealo; poezia senco — amo kaj deziro, sufero kaj espero: spirita fundamento de Esperanto."

laŭ, eble, subjektiva aprezo mia, ŝajnis al mi konstati ke, daŭre, dum la jaroj kvindekaj, la plimulto de la tiamaj publikigitaj versaĵoj surbaziĝis, esprime, sur teknikaj elanoj kaj manieroj de la jaroj dudekaj, kvankam la eŭropaj nacilingvaj poeziaj skoloj troviĝis

jam en sferoj multe pli superaj, precipe ek de la manifestiĝo de la "simbolismo" kaj de postaj enmodiĝintaj stiloj, ĝis abstrakteco, hermetikeco kaj verslibereco. Sed malfrue envenis novaj poezi-konceptiĝoj en la esperantlingvan poezion, sed tiam ili tre rapide invadis lavange la tutan beletran panoramon.

Nun, en la fina deko de nia jarcento, surprizas min tiu poemlibro, *El sisma zono*, kiu estas verkita, ne nur laŭ rigidaj ortodoksaj skemoj stancaj, sed ankaŭ laŭ tiuj reguloj nome tradiciaj pri "muziko" de perfektaj rimoj kaj ritmo akcenta. Kaj tio, de la unua paĝo ĝis la lasta, ĝuste kiam libereco forma kaj dira estas, centprocente, adoptita de la plimulto de nunaj junaj poetoj, por tiel povi adopti esprimeblecojn certagrade esoterajn.

Ni sufiĉe bone scias ke, pro la elkapablo de Esperanto, "tradicia" poezio altrangas en multaj paĝoj atestaj de la Esperanta Antologio de W. Auld, ĉar talentoriĉaj lirikistoj elscipovis la lingvon kun nedubebla poeta lerteco. Mikaelo Gišpling revenas al tradicio, kvaŭz retroirante tra tempotunelo, kaj kun perfekta harmonio inter tekniko poetika kaj lingva-leksiko-

na regado. Ĉu, do, la rezulto estas mirinde kontentiga? Jen: jes, laŭ la ŝablonoj antaŭtempaj kiuj, vere, povas esti ĉiam validaj surbaze de relativa geniececo.

Aliflanke, la koncepto pri poezio, dume, multe ampleksiĝis, kaj, en tio, do, moderna kritiko povas skermi opiniojn pli diversajn. Ĉu vere, poezio devas, pli kaj pli, transcendi objektivitecon por situiĝi en regionojn super realo? Ŝajnas al mi ke *El sisma zono* povus ludi rolon didaktikan favore al lernantoj de Esperanto por ke ili povu iniciigi en la metiajn sekretojn pri poemverkado.

Poemoj kiel Kanto por Donkiĥotoj, Kanto pri ekzekutistoj, La infero, ktp., estas plej evidentaj pruvoj de verkado de perfekta per la eblecoj supraj de la lingvo kaj laŭ la plej ortodoksa kaj simila maniero versfaradi. Tamen, mi kuraĝas opinii ke Gišpling devos plie riski provante alflugi al plej superaj sferoj de la poezia fenomeno, ĉar lia kapablo tion postulas.

Gabriel Mora i Arana

- Mikaelo Gišpling; *El sisma zono*, Serio "Stafeto" n-ro 19. Flandra Esperanto-Ligo, Antwerpen 1995

Libro-prezento

La pasintan 18an de aprilo okazis en Klubo de Amikoj de Unesko katalun-lingva prezento de la poemaro en esperanto *Pluralogo* de Vimala Devi. Temas pri la naŭa libro de verkistino el Goa (Baratio), de longe loĝanta en Barcelono, kiu ĝis nun arte sin esprimis portugale, katalune kaj hispane. Profesoro August Bové, el Barcelona Universitato, prezentis la verkaron de la aŭtorino, ĉefe ŝiajn du antaŭajn tri-lingvajn poemarojn eldonitajn en Barcelono. Post li, Manuel de Seabra verve parolis pri esperanto, ĝia multdevena literaturo kaj la kreiĝo de nova kulturo transnacia. Tuj sekve Vimala Devi laŭtlegis kelkajn el siaj lastaj poemoj, kiujn Seabra tradukis katalunen. Fine levigis diversaj demandoj, ĉefe pri esperanto. Partoprenis kvardeko da homoj —duono, esperantistoj—, inter kiuj elstaris Oriol Pi de Cabanyes, prezidanto de Institució de les Lletres Catalanes.